

24. novembari 2015

Nunatta pissarititai atorlugit sanaartornermut atortussiornermi tunisassiornissamik aallarnisaaniartut qanoq iliorluta tapersersorsinnaanissaat pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Ineqi Kielsen, Siumut)

Siumuminngaanniik nuannaarutigarpur una oqallisissiaq qaqqineqarmat.

Ukiopassuannortuni nunatta pissarititai assigiinngitsut atornerulernissai politikikkut ujartorneqartarpoq, oqallisaasaqalunilu. Tamannalumi inuiaqatigiit aamma akornanni.

Ujartorneqartarpoq nunatta pissarititai, assersuutigalugu aalisakkat atorluarneruneqartariaqartut, assersuutigalugu saarullit panertitat, kisianni aamma ilaatigut Islandimiik saarullit panertut tikisittarpagut.

Ujartorneqartarportaaq nunatta tunniussinnaasai allat, assersuutigalugu sanaartornerup silarsuaani nunatta tunniussinnaasai, soorlu oqallisaarisup Ineqi Kielsenip oqaatigigaa, sikublokkitut ittut sanaartornermi misiligaataasarsimasut, aammalumi tunisassiornissaq nunatsinnilu ataavarnerusumik illuliornermi allanillu sanaartornermi atornerunneqartarsimapput. Allaallumi immaqqa avammut tunisassiarineqalersinnaallutik. Misiligarneqartarsimapput.

Ajoraluartumilli maannamut suli annertunerusumik iluattinngittumik, tamanna qularnanngilaq assigiinngitsorpassuarnik peqquteqarpoq.

Immaqqa ilaatigut inuiaqatigiit ikittuunnguulluta, nalunngilarput sanaartugassanik tunisassiornikkut imaasiillaanaq nunarsuarmioqatittinnut unammilleriaannaanata.

Taamaammat una oqallisissiaq pineqartoq pingaarutilittut Siumumiit isigaarput. Maannamummi annertunerusumik iluattinngittoq qanoq isilluta iluattissuarput?

Tamanna assigiinngitsumik akissutissaqartoq qularnanngilaq.

Inuiaqatigiit ikittunnguugatta, pissarititagit imminut akilersinnaasumik iluattissappata, ilaatigut aaqqissuussaanagerusumik pilersaarusiukkamilu ingerlanneqartariaqartoq qularnanngilaq.

Tamannalumi anguniarlugu naalackersuisooqatigiit Siumut, Demokraatit Atassullu ilaatigut naalackersuisooqatigiinnissamik isumaqatigiissuminni imaattut anguniagaqarput, issuaaneq aallartippoq:

*“Sanaartornermi atortut avataaniit tikisinneqartartut annikillisinniarlugit,
Nunatta pissaritaanik atorluaanerunikkut inerisaasoqarnissaa Naalackersuisooqatigiit
sulissutigissavaat.”*

Issuaaneq naavoq

Qularnanngitsoq tassaavoq suliffeqarfimmik aallarniinarneq imaannaanngitsoq, nukippassuarnik, tiimerpassuarnik, suleqatissarsiornerpassuarnik atuiffiusartoq.

Assersuutigalugu silarsuarmi suliffeqarfiit nalitunerpaartaasa ilaat, immaqa tamatta nalunngisarput “Apple”, aallarniisut ilaasa ataataata quiani (garage). Uteriinneq, nutaanik isumassarsiorneq, piuumassuseqarneq iluattikkusullugu, nukippassuarnik atuineq pereermat suliaq siuariartulersimavoq.

Tamanna oqaluttuaq allarnisaasunut allarpassuarnut assiguvoq.

Nunatsinni aamma arlanisaasut arlaqartarput, tamanna nalunngilarput, ilai iluattittarput, ilai ajoraluartumik iluattittanngillat. Suliffeqarfimmik aallarnisaanerup silarsuaa taamaappoq.

Imaasiiallaannaq nunarsuarmioqatittinnut milliunilikkaanik inulinnut unammillersinnaanngitugut oqaatigaara nalunngikkippu, ilaatigut taamaammat inuiaqatigiit ikittunnguulluta suleqatigiinnissaq pisariaqarluinnarpoq, nunatta pissarititai iluattittumik atorneqassappata ataavartumik.

Assersuutigalugu pisortat sanaartortittinerisa ilaannut, pilersaarusiukkamik sanaartortoqarsinnaanerani sikublok atorlugu, sukumiisumik sulissutigineqarsinnaavoq.

Assersuutigalugu, pilersaarusiukkamik ingerlassinnaappat akitigullu unammillersinnaappat soormi Qaqortumi mittarfissap illutassaa sikublokimik sananeqaruni?

Imaluunniit, akitigut unammillersinnaappat pilersaarusionermullu naapertuuppat, soormi aatsitassarsiorniat ilai IBA aqqutigalugu isumaqatigiissusionermi illut imaluunniit illorsuit sanaartugassaasa ilaat sikublokimik atuigunik? Assersuutigalugu Kuannersuarni aatsitassarsiorfissaq aallartissappat.

Sanaartorneq sikublokinik ataavartumik annertuumillu ingerlanneqarsinnaappat, qularnanngilaq unammillersinnaanerulissaaq sanaartorluni atortunut allanut, soorlu qisunnut avataaniit eqqussukkattinnut. Naluneqanngilarmi annertuumik tunisassiorneq, tunisassiornermi aningaasartuutit agguaqatigiisillugu apparsarsinnaammagit.

Inuiaqatigiit ikittuunnguulluta suleqatigiinnissaaq pisariaqarpoq, nunatta tunniussinnaasai iluattittumik atorluarneqassappat, immitsinnullu illersornissaaq pisariaqarsinnaasarpoq, avataaniit tunisassianut unammillerniarnermi, taamaattoq aamma akitigut unammillersinnaaneq avataaneersunut aamma pingaaruteqartutut taasariaqarluni.

Taamatut Siumumiit oqaaseqarluta oqallisissiamut qujavugut.

Qujanaq.

Jens-Erik Kirkegaard, Siumut.